


AUZITEGI NAZIONALEA. Atzo goizean zen egitekoa Madrilgo Auzitegi Nazionalean Jon Abril Berako kazetariaren kontrako epaiketa. Epaiketa hasi aurretik, fiskalak sei urtetik sei hilabetera jaitsi zuen bere eskaera, eta akusatuak onartzea erabaki zuen.

Espetxeratzea saihesteko sei hilabeteko zigorra onartu du Jon Abril kazetariak

Praktikan inhabilitazioak bakarrik eragingo dio Berako gazteari, kartzela zigorra ez baitu bete beharko; ETari laguntzeko delitua koakzioengatik aldatu zuen fiskalak



MIKEL PEREZ

Iñigo Iruin eta Jon Abril kazetaria, atzo Auzitegi Nagusira heltzean.

Axun Erzibengoa | MADRIL

Espainiako Auzitegi Nazionalean gero eta maizago errepikatzen diren irudietako bat ikusi zen atzo goizean ere. Ahozko epaiketara sartu aurretik, fiskalak bere zigor eskaera aldatu eta akordioa proposatu zion Jon Abril kazetariaren defentsari. Urduritasun eta egonezin unekak izan ziren kazetariarentzat eta familiarentzat. Lehendik nerbioak dantzan, eta minutu gutxi batzuetan bere errugabetasuna defenditzea edo fiskalaren eskaintza onartzea eta espetxera ez dela joango ziurtatzea erabaki behar izan zuen gazteak. Bigarrenaren aldeko hautua egin zuen, eta, beraz, ia bi urteren ondoren, epaiketarik gabe amaitu da Abril en auzia.

Jesus Alonso fiskalak behin-behineko txostena egin zuenean, ETari laguntza ematea leporatu zion Jon Abrili, 2000ko abuztuaren 17an Ttipi-Ttapa telebistarako irudi batzuk grabatu zituelako Auzitegi Nazionalaren aurrean. Sei urteko espetxe zigorra, kazetari jardunerako eta hautetsi izateko sei urteko inhabilitazioa, eta 7.200 euroko isuna eskatzen zuen. Atzo, ordea, sei urteko espetxe eskaera sei hilabetera jaitsi zuen, eta espetxera sartzea beharrezkoa ez dela izango espresuki azaldu. Inhabilitazioa ere sei hilabetekoa izango da, eta hori izango da praktikan gauzatu den zigor bakarra, isunik ere ez baitiote jarri. Kolaborazio delitua, berriz, koakzio delituan utzi zuen atzo fiskalak.

Zapore «gazi-goza»

Erabakia ez zen erraza izan, baina egindakoa «hoberena» zela-ko ziurtasunarekin itzuli zen Abril etxera, eta «pozik, guztia amaitu delako». Eguerdian abiatu ziren Madrildik Euskal Herrira Berako (Nafarroa) kazetaria eta hari elkartasuna agertzera Euskal Herriitik joandako lagunak. Autobus batean Berako Udaleko zenbait ordezkari, herritarrak eta Abrilek lan egiten duen hedabideetako kide batzuk joan ziren, hala nola EUSKALDUNON EGUNKARIA, Ttipi-Ttapa eta Xorroxin Irratikoak.

Guztia amaitu delako pozik zeuden gehienak Auzitegitik irteetan, baina «zaporea gazi-goza» izan dela adierazi zuen bategen baina gehiagok. Josu Goia Berako alkatearen hitzetan, «perfektua izango litzateke Jon libre eta kargurik gabe utzi izan balute, baina hori ziurtatzerik ez

ANALISIA

■ Imanol Murua Uria

Joseph K. eta Jon Abril

EZINTASUNA. 2000ko abuztuaren 17ko zenbait telebistatako albistegietako berri nagusietan Jon Abril lankidea poliziek inguratuta ikusi genuenetik atzo bitarte, behin baino gehiagotan gogoratu gara Kafkaren *Prozesua*-rekin. Kasu honetan, errugabe dela jakinik akusazio oinarririk gabeak ulertu ezinik zegoena ez zen Joseph K. gizona, Jon Abril Ttipi-ttapako kazetaria baizik. Estatuaren aparatuari aurre egiteko banakoak zenbaterainoko inpotentzia izan dezakeen erakutsi zuen Kafkak *Prozesua*-n, eta horixe bera ezin hobeto erakutsi du, atzoko bukaerak ere bai, Jon Abrilen aurkako epaiketak.

AKORDIOA. Fiskalaren proposamenaren berri jakin zuenean, inolaz ere hartu nahi

ez zuen erabakia hartu zuen Abrilek atzo: errugabe izanda, errudun zela aitortu zuen. Bideo kameraz irudi batzuk hartu besterik egin ez, eta «koakzioa» egin izana onartu zuen. Zergatik? Kartzela saihesteko bide segurua bakarra hori zelako. Akordioa onartu ezean, sei urteko zigor eskaerari egin beharko zion aurre. Iñigo Iruin abokatuak argudio sobera zituen akusazioa funtsik gabea zela nabarmen uzteko, baina Jon Abril, argudio eta froga guztiak bere alde izanda ere, ez zen fio Auzitegi Nazionalearekin. Ez du alferrik ikusi, eta bizi, auzitegi horrek zentzurik gabeko auzi hau noraino eraman duen.

GIRO POLITIKOA. Zigor Arloko Laugarren atal berria zen Jon Abril epaitzekoa. Lehe-

nengo epaiketa zuen epaimahai horrek, baina auzian orain arte hartutako erabakietan erakutsia zuen belarria. Esate baterako, akusazioaren oinarri nagusia den bideoa —Jon Abrilen Auzitegi Nazionaleko atarian grabatu zuena— epaiketa aurretik ikusi ahal izatea ukatu egin zion defentsari. Gaur egungo giro politiko nahasiak, gainera, bidezko epai bat lortzen lagundu behintzat ez zuen egingo. Espainiako egitura judizialek ondo erakutsia dute zenbaterainokoa den Justiziaren independentzia bostere eragilearekiko eta unean uneko interes politikoekiko.

ESPETXERIK EZ. Jasandako bidegabekeriaren eta umiliazioaren parean, hala ere, atzoko albistearen alde baikorra ere nabarmendu beharra dago. Auziaren amaierak, zorionez, ez du Joseph K.ren kontrakoaren bukaeraren antzik. Jon Abril-en *Prozesua*. Eta ez dute espetxeratuko.